

詩

客思

庚寅冬

樂仁

颯颯寒風厲，綿綿細雨絲，蕭齋漏盡後，客恨復誰知？憶昔家門別，相對四淚垂，謀生計升斗，何堪輕別離，大地風雲急，扁舟顛覆危，四年遭喪亂，景物多遷移，邦家真多故，災難接相隨，長子走天涯，晤面知何時？老母遭大故，痛讀蓼莪詩，家留三兒女，賴妻獨苦持，愁腸日百轉，夢魂長相思，時欲乘風歸，關山多絆羈，塞途荆棘滿，悱惻將何之？歲月驚虛度，白髮傷暮遲，金線歷年年，老大徒傷悲，滄溟大海遠，何日是歸期？

哭母

庚寅

樂仁

母子相依四十年，慈容永渺歲寒天，烏私未盡無限恨，碧海蒼天血淚漣。母去春歸百念灰，南天遙奠隔塵埃，傷心最是別時語，頻問兒行何日回？

有感 癸巳

樂仁

于戈倭擾欲何之？一事無成兩鬢絲（引王積翁句），我自無能拋歲月，流光逝水去難追。

題泳裝小照 乙未夏

樂仁

久客他鄉強自寬，興來潭上且尋歡，解衣尙幸未衰朽，野寺老枝猶耐寒。

海濤兄惠詩步韻奉答

張兆蓉

天涯重見喜同遊，風雨飄搖共一舟，依舊故人甘陋巷，何來新貴盡朱樓？此生却被微官誤，舉世誰將大德修？且把中山千日酒，與君長醉莫言愁！

丙申仲夏時客臺北

寄張兆蓉兄

陳海濤

四十年前憶舊遊，鯤瀛重聚喜同舟，馮驩寄食空彈劍，王粲依人獨倚樓，愧我飄零雙鬢改，羨君福慧幾生修？故鄉風月今何似？怕聽鶯聲惹客愁！